

殘本

蔡忠烈公遺集

卷六

百折不回之概實足以激天地而泣鬼神故能感人以至於是則夫後之遙念其事者憑弔歔歔悲憤不自勝固亦出於中心之誠然而無所強者噫此後先輓公詩之所由作作而彙刻迄至於今而且有重刊之謀而余因是有感矣今夫好是懿德者烝民秉夷之良也崇祀死事者國家風厲之權也表章一方之賢德使百世俎豆不絕者守土者之責也當公殉難時事聞贈太僕諡忠烈建祠置田矣先是淩國俊藁公肉骨瘞長沙城外醴陵坡後兵使者堵公更具衣冠改葬於舊所又籍諸從逆家房屋及田

餘畝爲公祠田滄桑後人多侵踦公鄉人倪君康年令善
化查復祠宇清出祠田什之二三撫軍丁公趙公相繼表
墓釐祠焉夫前之人創之後之人守之又後之人尤宜保
之也丙寅夏余來守長沙欽仰公之忠義下車後詢知公
祠在郭西偏屈賈祠左躬親展拜卽悉意稽清祠田舊額
今者祠宇四進如故門之前鋪屋二間如故其田之在華
嚴塘洪山廟長塘三處者內有奇併山冊戶名蔡忠聖額
租貳百貳拾貳石亦如故而又於公墓前重修享堂一間
勒碑一座凡以表節烈昭舊典也夫以公之成仁取義與

先太傅同一志趨其浩然之氣充塞天地直將千古爲烈
廟食之有無固有不足爲公存亡者要以仰體我朝崇
獎忠義扶植名教之意則公之血食百世俾無至於不祀
而忽諸在官斯土者實無所容辭其責也顧念余總角時
隨任京都又宦遊四方不得偕族人拜埽先太傅祠墓又
自曾祖父來世守清白力不能置祭田今覩蔡公之廟貌
重新祭田永在回首家山蓋有缺然於心而不自安者則
夫堵公諸人經營創置之力後之人始未可忘其所自矣
余故於今者輓詩之重刊特爲表而出之庶幾千百載下

猶知忠靈如在當於此爲兢兢云乾隆十三年歲在戊辰
小陽之月知湖南長沙府事河南呂肅高拜撰

案呂君號南邨守長沙爲忠烈公修墓立神道碑又刊
行廖氏楚風補可想見其人忠節公名維祺明史有傳

原序

吾族在閩多理學節義之士明季流寇之亂捐軀殉節者
四川威茂道忠愍公諱肱明長沙司理忠烈公諱道憲其
最烈且著者也雍正癸丑表弟陳君矩亭令長沙郵寄忠
烈公遺詩並前後輓詩一集世遠讀之不禁撫然三歎也
當獻賊之破武昌抵襄陽而窺長沙也撫藩監司以奉吉
藩爲名相繼遁衡州時太守入覲公攝行太守事練兵湊
餉爲死守計賊知公愛百姓曰不降吾且屠長沙公泣曰
寧殺我毋殺百姓卽手刃乘城者數十人賊駭而退總兵

官尹先民陰送欵於賊與戰詐潰長驅逼城公急出百姓
十餘萬戶以孤城自誓城破遂執脅公降公怒罵不屈使
先民說公公罵曰恨不斬汝萬段手批先民先民羞走賊
擲刃堪公胸血濺賊首仆地賊膽落以刃加公頸公揚眉
舉足自若賊斷公足裂其眉截其兩手罵益烈鈎舌毀齒
抉眼劓鼻寸磔以死先是公被執時有役九人從公不去
賊先殺其五人以懼公公不爲動公旣死次及淩國俊國
俊者九人之一也國俊曰俟葬吾主後受戮賊許之國俊
枕尸呼天大哭解衣裹肉骨葬之城南醴陵坡還詣賊賊

義而釋之國俊曰是我藉義名以偷生也遂自經死事聞
贈太僕卿諡忠烈廟祀勿替兵使者堵公允錫爲具衣冠
改葬籍諸紳士從逆產爲公祠田吾鄉倪君康年令善化
倡新公祠復祠田之被侵沒者撫軍丁公思孔趙公申喬
相繼表墓釐祠事以國俊從祀公以名進士起家死時年
方二十有九所爲詩清幽峻肅凜凜皜皜如其人嗚呼自
古國家多難擾攘急迫之時豈無賣國求降偷生以全軀
身躋顯秩者顧其後世子孫以爲榮乎否乎卽其鄉之人
以爲榮乎否乎引而近之乎推而遠之乎公死已近百年

而凡官斯土居斯地者莫不憑弔嘯唏感仰而不能自禁
况於譜系之末桑梓之舊乎忠愍公之死緣松藩鎮帥朱
化龍內叛脅降兄弟妻子家衆死者三十二人公之死因
尹先民歟賊忠義所激感及從役豈不長垂天壤乎淩國
俊一徒隸耳一旦舍生取義遂使官紳兆姓瞻禮拜墓歷
千百年而不衰然則偷生者貴乎義死者貴乎讀斯編者
可以慨然奮矣世遠謹識

蔡忠烈公遺集卷之六

莆田黃梓北山原輯

宗裔應魁肖梅校



鍾音貽雅

德彰永三友蘭念香



附錄弔輓忠烈公詩

黃道周

石齋漳州人明翰林檢討

聞道潭州失江門必不生寧甘辭老母忍訣守孤城碧血
光雲漢丹心答聖明古今臣子節無愧堂堂名

堵允錫

牧遊宜興人

我友我友江門子黑鬚願身好司李三年冰雪府琴堂嘔
盡心肝民屋裏一朝劇賊和江吞十萬戶變魚蝦羹南朝
侍郎惟一蔡北面兒曹重見人口噴罵賊賊不了賊不殺
公公獨惱千秋正氣生跨箕五丈原頭星照草

王 岱

山長湘潭人

劫運丁衰季南楚暗兵革斬竿殺長吏所向成捲席大厦
無復支蒙面先遁跡卓哉晉江公神勇列戈戟背城決死
戰瓦解無完璧史垂睢陽青血被平原赤一嘯天爲回
公善
嘯長虹貫日白義士馮孝廉守節避鉤索不惜支體斷恥

頻南雲額義興堵撫軍石友敦夙昔泣血灑九招勒轉岫
嶠石配祀屈賈祠馨香不可射我來展祠宇蹕蹕還躅躑
同罹憂患人苟活愧朝夕余時同馮子被
索遠逃獲脫瀟湘萬頃清嶽
麓九面碧庶幾其來歸爲君灑魂魄

俞一鱗

養泉善化人

從來死字最難認死字惟公認得真若使今朝同衆醜幾
無一箇讀書人

菊花雨和蔡江門先生

善化

黃學和

二調

撐持秋事讓誰強山色濛濛菊影黃晚節不爭風月豔芳

心獨惹淚痕長飄零籬落愁無那抖擻精神瘦不妨却是
楚人添楚趣芰荷來往拾餘香

清秋報蔡江門司李

寧鄉

陶汝鰲

仲調

岫嶠亭上望高雲沆瀣秋來一氣勻何意海雲先出嶽居
然廉水後通閩松於礫礪知千尺宿有寒芒辯五辰我欲
擬君當太乙下觀嘗爲較書人

又

希聲久已托枯桐傳說逢人問孔融黃石應難忘孺子青
山未免笑愚公登臺客許從隗始奏雅予慚在曲終此事

古來關氣運剖懷聊得向春風

甲午從幼隗寓中讀忠烈蔡江門遺集有見懷一首
感而作寄知己之痛云

癯然一鶴想神清哭斷城南碧血墳午夜侶聞鸞鳳歎

公善

嘯孤魂甯與鬼龍爭平生何意推王粲當日誰能嘆杲卿
秋夜見懷詩尙在讀來奚止淚縱橫

朱繼祚

明禮部尙書

誰言是死卽堪悲畢竟無生死要奇千百萬人齊解甲惟
君一箇是男兒

曹學銓

能始福州人

古今殉難尋常事後死如何轉自憐爲愛忠奸顛不破輸
君香骨托寒煙

林 塗

子野福州人明侍郎

叔章爲類戚死後愧生貪節滿湘江秀忠開嶽麓嵐詩書
今不負膚髮可無慚自讀先亡句時時哭淚涵

鄒衍甲

明儲賢館學士

瞬息山河改文章不必名君今真善死我在豈圖生罵賊
尋常事全民痛切情長沙埋骨地千古有人評

又

青年多厚望此節更無疆膏襟魂無恙肢分志益強血流
紅日晦氣吐白雲長風雨孤臣在芳名播未央

黃起有

改菴莆田人明禮部侍郎

天意當屯蹇忠臣始見真問誰不有死惟子斷無生碧血
流三楚丹心照八閩懸知千載後青史字常新

鄒

鑒

明襄陽尹後亦死難

潭州八月軍聲壯社里千村報死頻萬里奔城嘶戍鼓孤
臣裹甲罵征人謾言成敗天多意贏得恩仇血滿襟顧我

自慚猶有誓殺身未了許君仁

鄒藩

明漢陽尹

忽報潭州戰骨空愧予江漢苦從戎畫蘭帝子同爲主芳
草王孫獨見忠歲月未消髀裏肉弓刀直長墓前桐蓼花
紅滴千江雨天亦年年哭蔡公

李文照

元朗善化人。

湘上一坏土愁雲結萬古當年攜藏司理骸骨化形銷名
不朽江漢浮浮感楚天波臣失鎖逸青猿九象狂奔無力
鬪百妖號咷彌長路藩王相國猿鶴悲白叟黃童蟲沙微